

224

418

8

準
貴



經山光

五言古詩

長山

幽林竹陰厚鳥道人迹絕

空人面影及方物無色白

所見皆水色我取以成心

又同歸下以清物則下宜

自心所成行欲心須知





遺山先生詩集卷第一

五言古詩

箕山

幽林轉陰崖鳥道人迹絕許君棲隱地唯有太古
 雪人間黃屋貴物外祇自潔尚厭一瓢喧重負寧
 所屑降衷均義稟汨利忘智決得隴又望蜀有齊
 安用薛干戈幾蠻觸宇宙日流血魯連蹈東海夷
 叔采薇蕨至今陽城山衡華兩丘垤古人不可作
 百念肝肺熱浩歌北風前悠悠送孤月



道山詩集
一
瀆古閣
緱山置酒

同內翰馮丈叔獻雷兄
希顏賦詩分韻得賓字

靈宮肅清曉細栢舍古春人言王子喬鶴馭此上
賓白雲山蒼蒼平田木欣欣登高覽元化浩蕩融
心神西望洛陽城大路通平津行人細如蟻擾擾
爭紅塵蓬萊風濤深鬢毛日夜新殷勤一杯酒媿
爾雲間人

同希顏再登箕山

千年箕山祠蘿徑深以悄桂樹不復見禿菽餘秋
篠盤盤盡絕頂石冢平木杪長風萬里來筋骸覺

輕矯側身望岩竇解衣憩林表是時夏春交野色
亂青縹川光乍明滅地脈互縈繞岡巒蟻垤出井
邑蜂衙擾紅塵洛陽昏白雲太行曉玄功信冥漠
一覽疑可了悟彼東山人胸中魯宜小

光武臺

東南地上游荆楚兵四衝游子十月來登高送長
鴻當年赤帝孫提劍起蒿蓬一顧漁水斷再顧新
都空雷霆萬萬古青天看飛龍巍然此遺臺落日
荒煙重誰見經綸初指麾走群雄白水日夜東石

麟幾秋風空餘廣武歎無復雲臺功

潁亭畱別

同李冶仁卿張肅子敬王元亮子正分韻得畫字

故人重分攜臨流駐歸駕乾坤展清眺萬景若相借北風三日雪太素秉元化九山鬱崢嶸了不受陵跨寒波澹澹起白鳥悠悠下懷歸人自急物態本閒暇壺觴負吟嘯塵土足悲咤迴首亭中人平林淡如畫

隱亭

春物已清美山谷懷自幽獨危亭一裘回翛然若新

沐宿雲澹川野元氣浮草木微茫盡楚尾平遠疑杜曲生平遠游賦吟諷心自足竭來著世網抑抑就邊幅人生要適情無榮復何辱乾坤入望眼容我謝羈束一笑白鷗前春波動新綠

出京

史院得告歸嵩山侍下

從宦非所堪長告欣得請驅馬出國門白日觸隆景半生無根著飄轉如斷梗一昨隨牒來六月阻歸省城居苦湫隘群動日蛙黽慙媿山中人團茅遂幽屏塵泥久相浣夢寐見清潁矯首孤飛雲西

南路何永

元魯縣琴臺

荒城草木合破屋風雨侵千年一琴臺
 瞻焉涕盈襟遺愛食縣社公寧不堪任
 此臺卽甘棠忍使無餘陰旁舍高以華
 大豪日捐金蒼雲玄武暮鬼物憑陰岑
 尚德抑玄虛墜典誰當尋我興薦寒泉
 百拜公來臨公來不能知落日下飢禽懷
 哉空山裏鶴飛猿與吟當年于薦歌補袞
 一何深承平示得意獨能正哇淫君相此
 一時又復悟良箴諛臣坐

廢黜合亦起幽沉蒲輪竟頽轂香草空
 深林寂寞援書空孤甥舉遺衾生平諒已
 然薄俗矧來今千山爲公臺萬籟爲公琴
 夔曠不竝世月露爲知音人間蹄涔耳已
 矣非公心

元道州文編以元魯山爲元魯縣又臺今爲玄

武祠故及之

隱水

聞鄆城張伯玉訃音作

隱水復隱水東望鴈行沒殷勤一杯酒
 遙酌隱亭月永懷紫髯郎冠佩見突兀
 岩岩石青峙鬱鬱松秀發裴回功名會
 脫落豪俠窟中州有士論指與

雷李屈挂弓須扶桑洗劍必溟渤皇天靳美器一
世惜英物神交付溟漠生氣凜毛髮古來天下馬
萬里入超忽良樂不竝世燕市空駿骨狂歌叫秋
雲北風撼林樾

雜著五首

稟氣寡所諧衣食固無端所業在農桑甘以辭華
軒田家豈不苦歲功聊可觀帶月荷鋤歸裴回丘
壠間曖曖遠人村紛紛飛鳥還養真衡茅下庶無
異患干遙謝荷蓀翁躬耕非所嘆

守拙歸田園淹留自無成長吟掩柴門遂與塵事
冥素月出東嶺夜景湛虛明揮杯勸孤影杯盡壺
自傾遙遙望白雲千載有深情

榮叟老帶索原生快納履邈哉此前脩久而道彌
著人生少至百每每多憂慮量力守故轍餘榮何
足顧棲遲固多娛幾人得其趣

桃李羅堂前霜露榮悴之咄咄俗中惡人道每如
茲冬嶺秀孤松卓然見高枝提壺拊寒柯懷此貞
秀姿願留就君住終身與世辭

世短意恒多時駛不可追感彼柏下人泫然沾我衣
運生會歸盡彼此更共之理也可奈何一觴聊可
揮酒中有深味情隨萬化遺西南望崑墟靈人侍
丹池我無騰化術帝鄉不可期且極今朝樂千載
非所知

古意二首

七歲入小學十五學時文二十學業成隨計入咸
秦秦中多貴游幾與書生親年年抱關吏空笑西
來頻在管學語初父兄已卜鄰跛鼈不量力強欲

緣青雲四十有牧豕五十有負薪寂寥抱玉獻賤
薄倡優陳青山亦區區何時畫麒麟遇合僅一二
寒飢幾何人誰畱章甫冠萬古徒悲辛

桃李弄嬌嬈梨花澹丰容盈盈兩無語齷齪爭春
風春風何許來草木誰青紅天公亦老矣何意夸
兒童昨朝花正開今朝花已空川流不肯駐併與
繁華東榷楠千歲姿骯髒空谷中陽和不擇地亦
復難爲功本無兒女心安用尤天公

潁谷封人廟

洩洩潁谷雲融融潁川水封君去我久水雲自清
美人言君善諫微意得鄭子特於悔悟時一語發
天理夫孝動天地土苴及頑鄙反身而未誠善諫
且敗矣如何千歲下乃與茅焦比我行潁川道永
念負甘旨願作潁尾魴因之日千里

贈荅劉御史雲卿四首

舊聞劉君公學經發源深驂駟萬里氣聖途已駸
駸大梁語三日副我夙所欽濂溪無北流此道日
西沉百年牛山木不復秀穹林南風雖寥寥聞絃

猶賞音獨憐夸毗子一我無古今共學君所貪適
道我豈任相酬無別物徒有好賢心

阿京吾所畏早生號能文初無王家癖聲光自流
聞此行不虛來得接大小君信知珠玉淵足當羔
鴈群君家有箕裘聖學待冊勲但使本根在枝葉
復何云殷勤五色筆未用摧千軍

學道有通蔽今人乃其尤溫柔與敦厚埽滅不復
留高蹇當父師排擊劇寇讐真是未可必自私有
足羞古人相異同寧復操戈矛春風入萬物枯枿

將和柔克已未有加
歸仁亦何繇先儒骨已腐
百罵不汝酬胡爲文字間
刮垢搜癥疣吾道非申韓
哀哉涉其流大儒不知道
此論信以不我觀唐以
還斯文有伊周開雲揭
日月不獨程張儔聖途同
一歸論功果誰優戶牖徒
自闢膠漆本易投九原
如可作吾欲起韓歐

老鶴何許來澹與孤雲同
相值太虛室悠然復西
東聖學要深談別君惜
匆匆何時沂水上同詠舞
雩風

送欽叔內翰并寄劉達卿郎中白文舉編修

五首

忽忽歲云暮烈烈風霜威
舉頭望長安游子從此
歸我有平生懷愛君如
連枝半年姜肱被所樂
良不貲尚恨人事異離
合無定時送君酒一杯
侑以彈鋏辭上言行路
難下言長相思

六月渡盟津十月行汜水
風濤脫沉舟冰雪危墮
指孝子在中野永念負
甘旨家貧親已老形瘵
心欲死古稱季路孝負
米曾百里顧作鯉與魴
寧當

怨積尾君歸不可緩獻壽迫歲始遙知慈母心已
爲烏鵲喜

一年不製衣春服犯霜風一日僅兩食腸胃不得
克生平萬里氣頓入低回中田夫怒攘臂縮首甘
盲聾老兵賜顏色歡喜無所容求索厭朋友勞苦
慚僕僮無聊復無聊又復招災凶我有一樽酒澆
君魄磊胸君年始三十白髮成一翁顧以寸心微
受此百慮攻君窮復何辭不見閑閑公文章二百
年不抹四壁空

君性我所諳我心君所知凡我之所短君亦時有
之謀事恨太銳臨斷恨太遲持論恨太高徇俗恨
太卑人道自近始貧富理不齊君自不得飽欲療
何人飢乞醯乞諸鄰聖哲有明譏被髮抹鄉人智
者所不爲且如與人交交有非所宜白黑不復擇
豁豁傾心脾汎愛豈不可復悔終自貽又如與人
言寧復無失辭刺口論成敗白眼談歌詩世故殼
簧間能不發其機聞君作損齋似覺豪華非懲忿
與窒慾百年有良規與子各努力歲晚以爲期

古人遙相望每恨不同時同時得古人歡樂良在
茲君歸豈不佳交游滿京師門前車馬來笑言慰
所思細話洛陽事高詠嵩山詩宮壺發新籟宮梅
耿幽姿故應劉與白亦復念微之

飲酒五首

襄城作

西郊一畝宅閉門秋草深床頭有新釀意慙成孤
斟舉杯謝明月蓬蓽肯相臨願將萬古色照我萬
古心

去古日已遠百爲無一真獨餘醉鄉地中有羲皇

淳聖教難爲功乃見酒力神誰能釀滄海盡醉區
中民

利端始萌芽忽復成禍根名虛買實禍將相安足
論驅驢上邯鄲逐兔出東門離官寸寸樂里社有

拙言

離官寸寸樂
晉俚諺云然

萬事有定分聖智不能移而於定分中亦有不測
機人生桐葉露見日忽已晞唯當飲美酒儻來非
所期

此飲又復醉此醉更酣適衰回雲間月相對澹以

默三更風露下巾袖警微溼浩歌天壤間今夕知何夕

後飲酒五首

陽翟作

少日不能觴少許便有餘比得酒中趣日與杯杓俱一日不自澆肝肺如欲枯當其得意時萬物寄一壺作病知奈何妾婦良區區但媿生理廢飢寒到妻孥吾貧蓋有命此酒不可無

金丹換凡骨誕幻若無實如何杯杓間乃有此樂園天生至神物與世作酣適豈曰無妙理滉漾莫

容詰康衢吾自樂何者爲帝力大笑白與劉區區頌功德

客從崑崙少來貽我招隱詩爲言學仙好人間竟何爲一笑顧客言神仙非所期山中如有酒吾與爾同歸

酒中有勝地名流所同歸人若不解飲俗病從何醫此語誰所云吾友田紫芝紫芝雖吾友痛飲真吾師一飲三百杯談笑成歌詩九原不可作想見當年時

飲人不飲酒正自可飲泉飲酒不飲人屠沽從擊
 鮮酒如以人廢美祿何負焉我愛靖節翁於酒得
 其天龐通何物人亦復為陶然兼忘物與我更覺
 此翁賢

德禪師清涼草堂

舊隱伊陸巷把茅入宴息新居蘭若峰老屋補漏
 坼鍾魚有勝氣餅錫無滯迹迴頭仙人隊談笑初
 未隔結草幾成壞逆旅誰主客道人那計許一笑
 山月白多生負詩債秋物苦催索遙知得新句崧

少為動色

上人舊隱伊陽伊陽有伊陸巷仙人隊者女兒山諸峯名

少林

雲林入清深禪房坐蕭爽澄泉潔餘習高鳥喚長
 往我無玄豹姿漫有紫霞想迴首山中雲靈芝日
 應長

劉曲龍潭

層冰積浩蕩陵谷低吞吐窈窕轉幽壑突兀開淨
 宇迴頭山水縣亦復墮塵土孤雲鐵梁北宇宙一
 仰俯風景初不殊川塗忽脩阻寒潭海眼淨黝黑

自太古螫龍何年臥萬國待霖雨誰能裂蒼崖雷

風看掀舉

山中人歲旱則轉大石入潭以駭龍瞬息致雨故云

麥歎

借地乞麥種微倖今年秋乞種尚云可無丁復無
牛田主好事人百色副所求盼盼三百斛寬我飢
寒憂我夢溱南川平雲綠油油起來望河漢旱火
連東州四月草不青吾種良謾投田間一太息此
歲何時周向見田父言此田本良疇三歲廢不治
平種則當倍收如何落吾手羊年變鷄猴身自是

早毋咄咄將誰尤人滿天地間天豈獨我讐正以
賦分薄所向因拙謀不稼且不穡取禾亦何絲辦
作高敬通惡雨將漂流吾貧有濫觴賢達未始羞
單衣適至胥一劍又蒯緱焉知寄食餓不取丞相
侯作詩以自廣時用商聲謳

北邙

驅馬北邙原踟躕重踟躕千年富貴人零落此山
隅萬冢不復識榛莽餘龜趺賢愚同一盡感極增
悲歎粵人惟物靈生也與道俱一為物所眩遂爾

迷厥初蛻骨幾山丘百年不須史歸盡固其理交
喪亦已愚陳迹有足悲奈此萬化途焉知原上冢
不有當年吾

龍門雜詩二首

石樓繞清伊塵土天所限人言無僧久草滿不復
剡灘聲激悲壯山意出高蹇當年香山老挂冠遂
忘返高情畱詩軸清話入禪版誰言海山去蕭散
仍在眼溪寒不可涉倚杖西林晚

不見木菴師胸中滿泥塵西牕一握手大笑傾冠
巾青山有佳招一游負因循老筇動高興萬景森
前陳乾元先有期清伊亦知津細看潛溪樹高臥
香山雲學詩二十年鈍筆死不神乞靈白少傅佳
句儻能新遙遙洛陽城梅花千樹春山中有忙事
寄謝城中人

豐山懷古

豐山一何高古屋蒼煙重閑門望吳楚鳥去天無
窮連山橫巨鼇白水亘長虹川原鬱佳氣自古南
都雄炎精昔季興臥龍起隆中落落出奇策言言

揭孤忠時事有可論生晚恨不逢漢賊不兩立大
義皎日同吳人操等耳忍與分河潼奪操而與權
何以示至公一民漢遺黎尺地漢故封守民及守
土天地與相終不能禦寇讐顧以寇自功既異洪
溝初又非列國從一券指半產二祖寧汝容端本
一已失孤唱誰當從至今有遺恨廟柏號陰風舊
聞清泠淵天籟如撞鐘山徑野人語誕幻欺孩童
開元有亂階鹿飲溫泉宮黃猿何爲者乃爾能嘯
兇乾坤之大音久鬱理當通清霜旦夕落佇爾驚

群聾

孔明白謂漢室季興清冷淵黃猿出見廟碑述開元事

乙酉六月十一日雨

一早近兩月河洛東連淮驕陽佐大火南風捲黃
埃草樹青欲乾四望令人哀時時怪事發雨雹如
李梅我夢天河翻崩騰走雲雷今日復何日駛雨
東南來元氣淋漓中焦卷意已迴良苗與新穎鬱
鬱無邊涯音崖書生如老農苦樂與之偕閭閻聞吉
語一笑心顏開酉年酒如漿乾溢安能裁唯當作
高廩多具樽與鬯家人笑問我君田安在哉與快

同音見
魏志

示姪孫伯安

伯安入小學穎悟非凡兒屬句有夙性說字驚老
師見汝挾書歸憶我青衿時青衿昨日耳齒髮忽
如茲讀書悞人多闊疎亦天資元無倚天劍可斷
扶桑枝倚梯望青冥愚者知笑之壯事已無取老
謀欲何施幸此掌中孫未染如素絲就令好紙筆
門戶誰當支我有商餘田汝壯可耘耔便當學種

樹未用城南詩

伯安方讀韓集
符讀書城南

種松

百錢買松羔植之我東牆汲井泥塵土插籬護牛
羊一日三摩挲愛比添丁郎昨宵入我夢忽然變
昂藏昂藏上雲霄慘澹含風霜起來月中看細鬣
攢針芒惘然一太息何年起明堂鄰叟向我言種
木本易長不見河畔柳顧盼百尺強君自作遠計
今者何所望

虞鄉麻長官成趣園二首

鑿池水交流築屋山四繞衡門在人境三逕深以

悄中庭八九樹晨坐聽百鳥人生信多慮長寢容
未了虛舟有天游我定物自擾豈不與世竝自是
萬物表達觀無不可言外當意曉

蹉跎匡山游爛熳彭澤酒慨然千載上懷我平生
友夫君負奇節劍氣鬱星斗爲吏非所堪徑去如
避走王官唐以還寂寞蓋已久柴車君來隱清風
動林藪至今溪上詩徃徃在人口淵明不可作此
士寧復有

雜詩四首

相士如相馬滅沒深天機區區銅馬法徒識牝與
驪人言當塗公惡人知其微如何許勸語受之不
復疑知人固不易人亦未易知媼妍在水鏡鉛粉
徒自欺孰爲仁義人未假已不歸伯樂不可作思
與曹瞞期

世事如大弩人若材官然乘勢易發機非時勞控
弦又如大水中置彼萬斛船雖有帆與檣亦須風
動天不見周公瑾弱齡已飛騫不見師尚父鷹揚
在華顛彼非生而材此豈晚乃賢鑑基喻智慧要

必有待焉嘆息狂馳子嘗爲愚者憐

崑山有璞玉外質而內美唯其不自銜故與頑石
齒和也速於售再獻甘減趾在玉庸何傷惜君兩
足耳

堂堂明堂柱根節幾歲寒使與蒲柳同扶厦良亦
難我衣敝緼袍我飮首藿盤天公方試我劍鋏勿
妄彈

采杞

仙苗不擇地榛莽散秋實微霜綠未噴濃露紅欲

滴方書尚服餌僮僕課采拾花葉久已饜功實從
此得苦茶薦奇味凡醞化靈液人傳東坡事世驗
西河術誑口亦自佳輕骨况可必維物多似是致
用相萬一向非觀玉篇誰爲分杞棘

宿菊潭

田父立馬前來赴長官期父老且勿徃問汝我所
疑民事古所難令才又非宜到官已三月惠利無
毫釐汝鄉之單貧寧爲豪右欺聚訟幾何人健鬪
復是誰官人一耳目百里安能知東州長官清白

直下村稀我雖禁吏出將無夜叩扉教汝子若孫
努力逃寒飢軍租星火急期會切勿違期會不可
違鞭朴傷汝肌傷肌尚云可天闕令人悲

觀浙江漲

一旱千里赤一雨垣屋敗浙故以江名暴與衆壑
會初驚沙石捲稍覺川谷隘雷風入兆驅大塊供
一噫千帆鼓前浪萬馬接後派崩崖不暇頷拔木
無留得憑陵如藉勢洄洑各有態平分乍舒徐怒
觸忽碎壞雲蒸楚樹沙雪映商嶺背髣髴千丈潮

况與海門對欽飛鬪蛟鱷燃犀出鱗介陽侯富陰
族萬首露光怪翠蕤澹偃蹇鉦鼓亂砲礮永懷疏
鑿力重歎神禹大乾坤海爲窟未礙變橫潰納汗
非無處流惡聊自快投詩與龍盟滌蕩煩一再時拜

大赦五
日矣

遺山先生詩集卷第二

五言古詩

鶴雀崖北龍潭

層崖閔頑陰水木深以阻湍聲半空落洶洶如怒
虎風生木葉脫魄動不敢語何年渾沌竅靈物此
棲處初從一綫溜開鑿到神禹雲雷鼓飛浪噴薄
齊萬弩藏珠驪龍領百斛快一吐油油入無底細
散不濡縷歸藏海有穴汎溢愁下土南峰天一柱
萬古鎮幽府江山有奇探落景迫行旅多慙茹芝

人終年看飛雨

五松平

竹港晨露白石門秋氣寒湍流濯澗壑細路深茆
菅江平白石出竟日沿清灣四顧不見人山鳥時
間關蒼崖入地底煙靄青漫漫力盡不能過却坐
空長嘆青天白雲閒可望不可攀虛名竟何得行
路乃爾難

阻雨張主簿草堂

溼暑雲氣鬱浸淫

去聲

成積雨南風竊陰機萬籟困

掀舉飛濤限江岸懸流迫茅宇塊坐百慮滋歸興
生鳥羽兒童十日約竹馬候門庶曾是百里城川
塗忽遐阻少游去我久念子平生語欵段劣可乘
羸餘果何取河汾敝廬在坐滯西南楚世事不可
期客心徒自苦

贈荅楊煥然

詩亡又已久雅道不復陳人人握和璧燕石誰當
分關中楊夫子高誼世所聞十年玄尚白藜藿甘
長貧有來河水篇四海付斯文斯文有定在桓生

知子雲古來知己難萬里猶比鄰千人國中和要
非心所親東楚西南秦望君勞我神相逢不得語
別去徒殷勤白雲不可贈相思秋復春

送詩人李正甫

陽和入枯株靄靄含芳津山頭太古石不與萬物
春朝從木客游暮將山鬼隣紫芝僅盈朶幽蘭不
克紉青雲入長吁肝膽空輪囷我嘗讀君詩天趣
觸眼新秦游得豪宕晉產餘真淳怒虎不受唾駭
鹿未易馴安坐誰不如半生走逶迤蒼蒼不可問

藐藐誰當親青山碾爲塵白日無閒人空歌東野
曲不揀西州貧

萬化如大路

萬化如大路物我適相遭往來限隣屋夢寐阻同
袍斷金幾何人年運劇銷膏相歡顧不足爾戈奚
暇操古來太山名達觀等秋毫蠻觸徒能國螺贏
竟誰豪曠蕩覽八紘美惡自爲曹造物無巧擇大
塊有并包暴公今在亡韓燐起蓬蒿孤心旣悄悄
衆口益嗷嗷同塵寧當悔枉已乃爲勞鹿門有高

躅世網儻能逃

曉發石門渡湍水道中

水經湍音專

疎星澹秋明陰霞絢朝映積雨成坐愁晨光動幽
興石門歸馭引湍浦漁舫竝曠蕩萬景新歸藏四
山靜平湖風漪綠遠岸秋沙淨洋洋遊魚逝汎汎
輕鷗泳隱顯乖夙心感寓見真性倦游徒自悼違
已時安竟憂端從中來茫茫發孤詠

放言

韓非死孤憤虞卿著窮愁長沙一湘纍郊島兩詩

囚人生定能幾肝膽日相讐井蛙奚足論禪虱良
足羞正有一朝樂不償百年憂古來帝王師或從
赤松游大笑人間世起滅真浮漚曾是萬戶封不
博一掉頭有來且當避未至吾何求悠悠復悠悠
大川日東流紅顏不暇惜素髮忽已稠我欲升嵩
高揮杯勸浮丘因之兩黃鵠浩蕩觀齊州

李道人崧陽歸隱圖

北山范寬筆老硬無妍姿南山小平遠澹若韋郎
詩崧陽古僊村佳處我所知長林連玉華納路入

清微連延百餘家柴門水之湄桑麻蔽朝日鷄犬
通垣籬媿我出山來京塵滿山衣春風四十日夢
與孤雲飛可笑李山人嗜好世所稀逢人覓詩句
不恤怒與譏道人本無事何苦塵中爲京師不易
居我癡君更癡山中酒應熟幾日是歸期

黃公廟

羈客無恒居六月走長路清風黃公祠地古欣所
遇劍飛素靈哭龍躍雲雨赴堂堂文成君談笑取
帝傳功名要有命陰相果何預誰謂圯上人異事

驚竹素河清不可俟筋力疲世故袖間一編書塵
埃嘆遲暮

學東坡移居八首

廢地三畝餘十年長蒿萊瓦礫雜糞壤白骨深蒼
苔孤客無所投卽此營茅齋墾斷豈不苦寢處亦
可懷辱身賤者事寧當惜筋骸伐木荒林中運甃
古城隍辛勤八十日吾事乃得諧買宅必萬錢一
錢不天來今晨見此屋一笑心顏開

誰謂我屋寬寢處無復餘誰謂我屋小十口得安

居南榮坐諸郎課誦所依於西除著僮僕休沐得
自如老我於其間兀兀窮朝晡起立足欠伸偃臥
可展舒牕明火焙煖似欲忘囚拘屋前有隙地客
舍不可無花欄及菜圃次第當耘鋤東野載家具
家具少於車我貧不全貧尚有百本書

故書堆滿床故物貯滿箱渾渾商寶昂纍纍漢銅
章杖飾昭敬恭嚴卯訶痺剛雷文繞杖節獸面山
佩璜私印刻王尊玉斗蛟龍翔逸少畱半紙魚網
非硬黃亦有曇首帖不辨作鴈行雪景睿思物宜

政舊所藏晉公古漁父浩歌濯滄浪因觀宮騎圖
臥駝識提囊谿石含餘潤奚墨凝幽香南榮挂風
響雲裾珮鏗鏘鏡背先秦書八字環中央讀之三
嘆息此日何時光

壬辰困重圍金粟論升勺明年出青城瞑目就束
縛毫釐脫鬼手攘臂畱空橐聊城千里外狼狽何
所託諸公頗相念餘粒分鳧鶴得損不相償抔土
填巨壑一冬不製衣繒纈如紙薄一日僅兩食強
半雜藜藿不羞蓬累行粗識瓢飲樂敵貧如敵寇

自信頗亦慤兒啼飯籬空堅陣爲屢却滄溟浮一
葉渺不見止泊五窮果何神爲戲乃爾虐

舊隱嵩山陽筍蕨豐餽餉新齋浙江曲山水窟放
浪乾坤兩茅舍氣壓華屋上一從陵谷變歸顧無
復望樵漁憶徃還風土夢閒曠况如悟前身姓改
心不忘去年住佛屋盡室寄尋丈今年僦民居臥
榻礙盆盎靜言尋禍本正坐一出妄青山不能隱
俛首入羈鞅巢傾卵隨覆身在顏亦強空悲龍髯
絕永負魚腹芥置錐良有餘終身志悲愴

國史經喪亂天幸有所歸但恨後十年時事無人
知廢興屬之天事豈盡乖違傳聞入讎敵祗以興
罵譏老臣與存亡高賢死兵飢身死名亦滅義士
爲傷悲哀哀淮西城萬夫甘伏尸田橫巨擘耳猶
爲談者資我作南冠錄一語不敢私稗官雜家流
國風賤婦詩成書有作者起本良在茲朝我何所
營暮我何所思胸中有茹噎欲得快吐之溼薪煙
滿眼破硯冰生髭造物畱此筆吾貧復何辭
東坡謫黃州符藥行江湖荒田拾瓦礫賤役分僮

奴我讀移居篇感極爲悲歎九原如可作從公把
犁鉏我貧公亦貧賦分無賢愚論人雖甚媿詩亦
豈不如

此州多寓士論年悉肩隨風波同一舟奚必骨肉
爲倪家蓮花白每釀必見貽季昌妙琴事足以相
娛嬉郭侯家多書篇帙得徧窺趙子篤於學間以
問所疑王生舊鄰舍窮達心不移千里訪存歿十
口分寒飢獨有仲通甫天馬不可羈直以論詩文
稍稍窺藩籬永懷王與李朔漠行當歸書來聞吉

語報我脫繫維慚非一狐腋不直五殺皮我作野
史亭日與諸君期相從一笑樂來事無庸知

歷下亭懷古分韻得南字

東秦富佳境北渚擅名談茲游亦已久纔得了二
三南山壓城頭十里奎與函泆流出地底城隍滿
泓潭金絲弄晴光玉玦響空嵌清漣迥画舫秀木
深雲龕華峰水中央鬱鬱堆煙嵐荷華望不極綠
淨紛紅酣毒熱非山陽卑溼無江南承平十萬戶
他州隔仙凡劫火土一丘樹老草不芟巧盡露天

質到眼皆奇探千年歷下亭規模見覃覃懷賢成
獨詠勝賞何絲參

舜泉效遠祖道州府君體

重華初側陋嘗耕歷山田至今歷下城有此東北
泉喪亂二十載祠宇爲灰煙兩泉廢不治平漸著
瓦礫填蛙跳平聚浮沫羊飲畱餘羶我行歷荒基
涕下何漣漣舜不一井庇下者何有焉帝功福萬
世帝澤潤八埏要與天地竝寧待一水傳甘棠思
召伯自是古所然我欲操畚鍤浚水及其源再令

泥濁地一變清泠淵青石壘四周千祀牢且堅石
渠漱清溜日聽薰風絃便爲泉上叟杯飲終殘年

與張仲傑郎中論文

文章出苦心誰以苦心爲正有苦心人舉世幾人
知工文與工詩大似國手碁國手雖漫應一著存
一機不從着着看平何異管中窺文須字字作亦
要字字讀咀嚼有餘味百過良未足功夫到方圓
言語通眷屬只許曠與夔聞絃知雅曲今人誦文
字十行誇一目闕顛失香臭瞽視紛紅綠毫釐不

相照靚面楚與蜀莫訝荆山前時聞別人哭

濟南廟中古檜同叔能賦

亭亭祠宮檜鬱鬱上雲雨扶持幾來年造物心獨
苦青餘玉川潤根入鐵岸古雖舍棟梁委斤斧安
得取沈湫地中久駭浪思一鼓天柱屹不移水國
奠平土乾坤此神物甲乙存世譜瀨鄉畱耳孫闕
里傳鼻祖秦松徒自汗蜀祖聊共數會待十抱成
茲焉重摩拊

銅鞮次村道中

山徑一何惡一澗復一嶺昂頭一握天放脚百丈
井武鄉有便道故遶銅鞮境涉險良獨難又復觸
隆景羸驂蹄已穴怨僕氣將瘦與世恒背馳用力
何自省河汾紹絕業疑信紛莫整銘石出壙中昧
者宜少警少時曾一讀過眼不再省南北二十年
夢寐猶耿耿喻如萬里別燈火得對影行役豈不
勞聊當忍俄頃

蕭齋

并引

故民部長陵蕭公泰和大安之間名德雅

望朝臣無出其右其爲太原道漕使時不肖方廁諸生間顧嘗一望眉宇以爲甚幸然亦以齒少且賤不得與橫經之末而爲恨也北渡後居陽平見關中人邢公達談公平生徃徃色揚而神躍問之知其爲公夫人之猶子也蓋公達之先人於公恩義良厚而公所以報之者爲甚力公達初仕部掾年甫三十遂爲州上佐出入臺閣者二十年雖其材致然亦藉公爲之司命耳

予雅知公達之敬公也凡欲聞公之故則就訪之公達所居之屋乞名於予因以蕭齋目之且爲之說云士之生世有一鄉之士有天下之士有一人之所私慕有天下之所共稱分限所在不能以強人而人亦不得而強之也惟公承王公餘烈奕葉台鼎世譜完具與當陽杜氏相上下故言氏族者推其貴出入經史優柔厭飫發擿祕奧不減前輩蔡無可故言討論者服其博

奏讞疑獄致力忠愛一言之仁利及永久
故言斷獄者歸其平彊禦不奪其標公相
不易其介幅巾鄉社坐鎮頽俗故言進退
者推其高蓋天下所共稱非一人之私慕
高山仰止其誰曰不然古人有愛蕭子雲
筆札者得蕭之一字遂以名所居况於其
所天乎因爲詩以貽公達有好賢如緇衣
者請爲同賦焉

十年金門客一日蓬蒿人煙煤兩椽屋因公名字
新管公無恙時四海望經綸敦龐一古儒風采自
名臣人亡典刑在百世留清塵師尊世共然况子
夙所親愛公入夢想逶迤見垂紳教兒多讀書公
言諒諄諄他時門戶改亦惟公所姻我嘗望公顏
道左避朱輪至今誦其詩喜色爲津津歸秦如未
老會買東家隣

別李周卿三首

行路澀於棘單車望千山歌君歸雲曲清涕留餘
潛六年河朔州動輒得謗訕唯君篤高義日來款

柴關古交松栢心今交桃李顏古人去不返古道
挽不還相思一樽酒幽恨寄山間

風雅久不作日覺元氣死詩中柱天手功自斷鼇
始古詩十九首建安六七子中間陶與謝下逮韋
柳止詩人玉爲骨往往墮塵滓衣冠語俳優正可
作婢使望君清廟瑟一洗箏笛耳

城居日蛙黽局促復局促去作山中客放浪誰檢
束溪光淡於冰山骨淨如玉懷我同心人團茅住
深竹垂綸鮮可食種秫酒亦足石壇三萬丈醉眼

天一粟安得萬里風相從兩黃鵠

周卿學有淵源
東州詩人未見

其比與予約西
游如詩中所說

訓韓德華送歸之作

良朋滿東州歲月見忠悃韓侯晚相值意氣尤懇
懇我嘗相斯人趣向識端本立節拍有心樹德蘭
在畹官榮睨不顧寄興浮雲嶽今世走名場旗旆
幾仆偃賤子本無取玉趾渠往返昨聞遂歸養見
謂竹林阮暑涂三百里追送不憚遠觀君木訥姿
百念爲日損顧方慙衣綱又被以華袞桑榆倘可

收歲事在穰蓂里門眼中見歸袖勞重挽鷄黍先
有期升堂未言晚

戊戌十月山陽雨夜二首

朔吹作還止雲意鬱以周十月雷收聲陽和自油
油此雨非舊雨春旱歷夏秋道路上三尺今朝見
浮漚三城信樂土凶年未消憂一蝗食禾盡半菽
不易求流民四方來斷港魚蝦稠忍死待一麥秋
種且未投乾溢誰所司雩壇徧九州醉飽到狐鬼
巫覡自懷羞帝命淙江湖野語良悠悠龍公爲汝

賀桑榆定可收

霏霏散浮煙靄靄集微全出門望白塔但覺襟袖
潤繁聲忽赴節細點復成陣久渴疑未厭平已作
寧小靳山陽冬候煖麥脚易滋分去土膏入滲漉
破粒容可趁此邦信可樂風土同一晉單車我東
來塵土滿歸鬢裹糧失先具閉糴困餘吝今朝人
事改一雨開百順僧牕晚色淨喜極夢爲盡枕上
一詩成燈花落紅燼

看山

慘慘悲去國鬱鬱賦卜居不采西山薇卽當葬江
魚今日忽有得蕩如脫囚拘青山坐終日忘讀案
上書臯壤與山林使我欣然歟我身天地間託宿
真遽廬無窮閱有限萬期亦須臾坎止及流行何
計疾與徐百年險與夷又似萬里途良馭馳康莊
九折亦摧車必惟易之就遇險當何如化化復生
生體異理不殊鷺非俗而白烏豈黔而烏誰續長
脛鶴誰截短足鳧孔墨不暖席盜跖華堂居公車
困方朔太倉飽侏儒杜子露雙肘朝參出無驢軟
裘與快馬照耀輿臺軀天隨隱笠澤杞菊供盤盂
擊鮮日爲具大嚼皆屠沽乖逢自乖逢賦分無賢
愚作計窮一我造物良區區嚮也憂不足乃今樂
有餘

九日讀書山用陶詩露淒暄風息氣清天曠

明爲韻賦十詩

行帳適南下居人跼庭戶城中望青山一水不易
渡今朝川涂靜偶得展衰步蕩如脫囚拘廣莫開
四顧半生無根著筋力疲世故大似丁令威歸來

歎墟墓鄉閭喪亂久觸目異平素粉榆雖尚存歲
晏多霜露

今日復何日霜氣倏已淒登高有佳招山中古招
提翩翩劉公子王田重相携乾坤動詩興澗壑忘
攀躋霍侯家甚貧劣有酒與鷄城居厭鼙鼓移家
此幽棲世網不易逃所向皆塵泥何以濯我纓林
間有清溪

山腰抱佛刹十里望家園亦有野人居層崖映柴
門咎我東巖君曾此避塵喧林泉畱杖屨歲月歸

琴樽翁今爲飛仙過眼幾寒暄蒼蒼池上柳青衫
見諸孫疎燈照茅屋新月入頽垣

二句先
人詩

依依覽

陳迹惻愴不能言

霜氣一匣薄杳杳秋山空臨高望烟樹黃落雜清
紅造物故豪縱窮秋變春容錦障三百里不盡臺
山東燦燦黃金華羅生蒿艾叢野人不知貴幽香
散秋風秋物自橫陳顧揖苦不供誰能搖醉筆吐
句凌清雄

宇宙有此山閱世過鳥疾何人不此遊名姓寧復

識茲辰世所重前代多盛集柴桑有故事二謝留
俊筆併數孟與桓此外諧計憶人生百年內踏地
皆種迹獨惟我輩人興懷念今管山林與臯壤自
古長太息

賞心古難并暮景日易費故人成此游尊酒重相
慰新詩互酬唱清談見滋味鱣鯢方偃蹇鼃黽共
騰沸懸險劇褒斜清渾雜涇渭爭教十圍腹滿貯
憂與畏情親到真率寧復轉喉諱彰重伯雅生藉
汝聊吐氣

往年在南都閒閒主文衡九日登吹臺追隨盡名
卿酒酣公賦詩揮洒筆不停蛟龍起庭戶破壁春
雷轟堂堂髯御史痛飲益精明亦有李與王玉樹
含秋清我時最後來四座頗爲傾今朝念存歿壯
心徒自驚

我在正大初作吏浙江邊山城官事少日放浙江
船菊潭秋華滿紫稻釀寒泉甘腴入小苦幽光出
清妍歸路踏明月醉袖風翩翩父老遮我瞿謂老
欲登仙一別半山亭回頭餘十年江山不可越目

斷西南天

吾山一何高
清涼屹相望
龍頭出白塔
佛屋壓青嶂
雲光見秋半
旭日發豪相
峩峩寶樓閣
金界儼龍象
鄉曲二十年
香火闕瞻向
金香綿草夢
想雲雨上
福田行欲近
重爲詩酒障
終當陟層巔
放眼宇曠

紫微老仙伯
少日見承平
甲子五百餘
雙瞳益清明
披莊不盈尺
翛然澹無營
庭柯挂秋蔬
老樹風冷冷
我有年德尊
公深鄉曲情
思得菊潭酒
爲公

制頽齡作詩語
同游明年復尋盟
看公九節杖
翩翾上崢嶸

畱月軒

丈室何所有
琴一書數冊
花竹結四隣
繁陰散芳澤
閒門無車馬
明月卽佳客
三人成邂逅
又復得驩伯
驩伯屬我歌
蟾兔爲動色
商聲隱金石
桂樹風索索
乾坤月與我
光滅卽生魄
元精貫當中
寧有天壤隔
卯君尚奚待
言論累數百
多談令人厭
坐睡驚墮幘
一笑鷄未鳴
虛牕自生白

梨花海棠二首

梨花如靜女寂寞出春暮春工惜天真玉頰洗風
 露素月澹相映蕭然見風度恨無塵外人爲續雪
 香句孤芳忌太潔莫遣凡卉妒
 妍花紅粉妝意態工媚嫵窈窕春風前霞衣欲輕
 舉金盤渺華屋國艷徒自許依依如有意脈脈不
 得語詩人太冷落愁絕殘春雨

遺山先生詩集卷第二終

遺山先生詩集卷第三

五言古詩

趙吉甫西園園名種德

王城比民居近市無閒田閒田八九畝乃在城西
 偏久矣瓦礫場莽爲狐兔阡高人一畱顧老木生
 雲煙築屋臨清流開窗見西山人境偶相值遂無
 城市喧趙侯嗜讀書兀坐守遺編性情入吟咏古
 澹無妖妍酸鹹與世殊至味久乃全我作別墅詩
 請爲子孫傳耕耘有定業歉豐屬之天寧作鹵莽

兒袖手待逢年汲古先有齋種德今有園期君在
晚歲無庸計目前

臨汾李氏任運堂二首

并序

彥仁從軍久厭於事物之累念欲脫去之
而不可得也故嘗鬱鬱不自聊求予發藥
之予名其居曰任運堂且爲賦詩

官職有何好凜凜蹈危機車塵及馬足捧手仍佞
眉棄去何足道無從脫繫維不如聽其然歲晚倘
可期此心未馴初養虎時飽飢一爲金石止坐閱

萬物馳汨泥揚其波哺糟歎其醜漁父我所學靈
均竟奚爲上堂壽慈親兄弟如墳簾菽水足致樂
况有甘與肥人生天地間長路有險夷遇險卽欲
避安得皆通達君家北山翁百世留清規樂天而
知命行矣君何疑

北山翁彥仁之伯祖秦和間以
高道提點天長胥莘公贈詩有

百世清規之
語故及之

履危恨無機避禍欣有策後慮徒自密前路寧汝
測七戰歿牖下坐談得刺客周身容孔智伐樹不
宋厄九折怯乘險瘴海悲遠謫就令家長安獨不

死林簣人生多憂畏年壽幾至百惴惴首尾間天
 宇坐成窄重泉青雲梯平地黃土陌乖逢有定在
 拙計徒巧擇行樂當及時莫待頭雪白
黃土陌見初學記奴

題張左丞家范寬秋山橫幅

層崖闕長陰細逕緣絕巘梯雲欄干峻廓廓清眺
 展斜陽半天赤飛鳥大江遠清霜張秋氣草樹生
 意剪風雪斫堅敵旗旆紛仆偃崢嶸峰巒出莽蒼
 林薄晚盤盤范家筆老懷寄高蹇經營入慘澹得

處乃蕭散嵩丘動歸興突兀青在眼何時臥雲身
 團茅遂疎嬾

宿張靖田家 地屬壽陽

川涂盡坡陀嶺路入荒梗微茫望煙火向背得廬
 井殘民安朴陋倦客喜幽屏兒童聞叩扉租吏有
 餘警兩崖紛藁薄砂石立頑獷湍流落空嵌百折
 不容騁山深饒風露夜氣凄以耿園花淡相望邊
 月空照影深居苦不早素髮忽垂領誰謂林野人
 茲焉惜清景

曲阜紀行十首

荒城臥魯甸寒日澹平蕪千年素王宮突兀此城
隴我昔入小學首讀仲尼居百讀百不曉但有唾
成珠少長授魯論稍與義理俱攝齊念升堂壞壁
想藏書翩翩七十子佩服見舒徐慨然望闕里日
思膏吾車五原東北晉因循迫桑榆今日復何日
南冠預庭趨隱隱金石聲恍如夢清都偉哉神明
觀欣幸當何如

殿屋劫火餘瓦礫埋荒基入門拜壇下儼然想光
儀憶當講授初佩服何逶迤登降幾何人鸞鳳相
追隨千年仰階級天險不可躋文杏誰此栽世世
傳清規植根得所託在木將何如

堂堂魯三檜培植出天巧規摹欲十抱奇秀供百
繞誰言甲戌亂煨燼入炎燎青煙干雲上群鶴空
自矯哀哀嶧陽人腸肺痛如攪魯郊木何限名取
唯一少神明信扶持厄運豈易曉雩臺滿荒榛遠
宮餘曲沼紛紛閱成壞何異晏與早道存有汗隆
物齊無壽夭霜皮眼中見鬱鬱自塵表君看太山

石萬古青未了

陋巷陋復陋老屋在人境門前軒蓋多閉戶自幽
屏近郊無百畝負郭纔半頃餽粥聊自供取足唯
一井此井閱千歲清節傳笄賴尚想瓢飲初至味
久益永德鄰與周旋聖域容造請貧中有此樂日
暮獨何炳泓然窺古甃一勺試甘冷上池果能神
轉盼得深省塵埃竟何有素髮忽垂領共學誰我
容從之抱脩綆

泮宮何所有舞雩但荒臺泮水涸已久北風捲黃
埃顧瞻魯公宮感極令人哀獻馘亦盛事規摹到
平淮作計萬萬古而今安在哉獨愛鼓瑟翁不與
三子偕宗周方訖錄聖師猶卷懷但欲春服成風
乎詠歸來我亦淡蕩人涉世寡所諧浴沂行有日
一笑心顏開

大姦何所如猘偷雄且猛雖然弭耳伏擇肉會一
騁卯也不敗露名與聖師竝天刑竟莫逃不待七
日頃曹瞞盜漢璽僅得係要領與卯均小人脫網
乃差幸小偷學不至適足污鍤鼎不從市朝肆必

就遠方屏兩觀餘坡陲萬世示頑穢神兵凜可怖
過者宜少傲

不見講堂處指以存世譜遺基洙泗間荒惡餘十
畝聖師既已老自衛婦在魯正樂修六經卒業此
其所當時季路室完整逮建武太僕忠且壯持用
方禦侮如何唐盛日一廢不重舉中和天地位寧
復俟庭廡所嗟世道衰師授日莽鹵空餘千歲井
黥黑眼終古

白塔表佛屋萬瓦青粼粼何年勝果寺西與姬公

鄰塔廟恣汝爲豈合魯城闔魯人惑異教吾道宜
湮淪許行學神農耒耜手自親當時子孟子直以
爲生民况彼桑門家糞壤待其身一朝斷生化萬
國隨荆榛孟氏非所期安得楊與荀丹青贊神化
舊染爲一新空令鍾魚地再睹籩豆陳吾謀未及
用勿謂秦無人

天地有至文六籍畱聖謨聖師極善誘小智祗自
愚文章何物技不直咳唾餘操戈競虛名望塵拜
高車所得不毫髮咎責滿八區公論懸日星豈直

小人儒喻彼失相者，
俛不知所如指南。
一授轡聖門，有修途。
陽光照薄暮，尚堪補東隅。
悠哉發深省，洒掃今其初。

林墓連魯城，方廣十里間。
林間百草具，棘荆死不蕃。
楷槐作橫理，青青閱千年。
懷人成一慨，何止召公賢。
博陵石翁媪，名字無畱鐫。
兩獸墓前物，歲久乃訛傳。
昨我游魯門，規作孔林篇。
聖人與天大，聖道難爲言。
所見不一記，來者何述焉。
詩成私自媿，小子良斐然。

寶嚴紀行

陰崖轉清深，秋老木堅瘦。
城居望已遠，步覺脫氛垢。
寶嚴夙所愛，丈室方再叩。
曛黑纔入門，徑就石泉漱。
遙遙金門寺，寶焰出岩竇。
我豈無盡公，昔見今乃又。
同來二三子，寢飯故相就。
况有杜紫微，琴筑終雅奏。
曠曠上初日，深樾爛穿漏。
逶迤陟西巘，萬景若迎候。
絕避三面開，仰看勞引照。
兩山老突兀，屹立柱圓覆。
諸峰出頭角，隨起隨偃仆。
不可無煙霞，朝暮爲先後。
橫亘連巨鼇，飛墮集靈鷲。
九華

與奇巧五老失渾厚想當位置初遂欲雄宇宙太
行有硤谷勝絕無出右大似塵外人眉宇見高秀
哀湍下絕壑電擊龍怒鬪崩奔翻雪窖瑩滑瀉瓊
蹙窮源得懸流偉觀駭初邁仙人寶樓閣白雨散
簷溜天孫拂機絲素錦絢清晝永懷登高賦意匪
困馳驟窘於游暴秦百說不一售林間太古石稍
復抔飲舊已約銘窪尊細鑿畱篆籀茲山緣未了
僧夏容宿畱終當丐餘年奇探盡雲岫

鴈門道中書所見

金城畱旬浹兀兀醉歌舞出門覽民風慘慘愁肺
腑去年夏秋旱七月黍穉吐一昔營幕來大明但
平土調度急星火逋負迫捶楚網羅方高懸樂國
果何所食禾有百騰擇肉非一虎呼天天不聞感
諷復何補單衣者誰子販糴就南府傾身營一飽
豈樂遠服賈盤盤鴈門道雲澗深以阻半嶺逢驅
車人牛一何苦

岳祠齋宮夜宿

煌煌德寧宮望秩年祀永唐來幾焚蕩規制仍峻

整龍旂嚴黼座金罽散光炯嶽拜行且周偉觀竊
欣幸青紅畱壞壁兵衛自馳騁木杪見龜趺雄筆
映鍾鼎中和昔喪亂已溺寧再拯有來鴈門公赤
手探虎鯁經營入慘淡洒落出鋒穎凶豎竟自摧
神鑒益彪炳青山閱人代今古一炊頃摩挲盤根
槐甲子誰記省竭來石門道煙岫接雲嶺霄漢瞻
上階濃碧插秋影青林雨聲集懸瀑激奔猛森然
心魄動冰雪淒以耿飄飄想仙袂飛下玉蓮井昨
夢知是非復此造真境妙香淨餘習灑氣發新警
鶴書來何遲素髮迫垂領玄壇展衰步似欲逐幽
屏高柯月紛紛裴回惜清景

示程孫四首

并州望南宮東南千里餘六年念兒女鬱鬱心不
舒程孫問安否一月兩寄書老我倦出門况是涉
畏途鞍馬二十日面色爲焦枯白兄應見笑此行
亦區區

吾女在吾家先已安卑弱雖然適貴門一味甘儉
薄財廉出仁讓語省見端慈婦道化一州母女皆

願學州人聞我至相與喜且愕謂我六十翁齒髮
未衰落擊鮮日爲具和氣動城郭爲說壻女賢宅
相知有託乃公私有賀一月醉杯杓生女四十年
今有爲父樂

直孫年志學玉立無纖瑕簡孫甫勝衣芳蘭出其
芽爍爍彩翠翔鵷雛映朝霞諸孫獻翁壽喜極復
長嗟吾母河南君閨門靜無譁殷勤教女孫乃今
成汝家老我何足道外舍儘得誇

會聚樂不貲言別悽以惻風雲動老懷車馬見行
色明年吾六十家事斷關白唯當近酒醞亦復拋
書冊提携兩童子款段或下澤玉雪念吾孫未覺
千里隔乘輿徑一來髯壻當速客

九月初霖雨中感寒痺作

畱飲工作崇臂股半風淫風淫喜陽景旬浹坐秋
霖兒寒益跳梁衰暮苦難任病枕怯遙夜破窗風
露深兩年魏大名千門響霜礎客行足繒纊家居
但疎衾絢絲不易得候蟲徒自吟無衣思南州傷
哉非獨今

同白允賦餅中玉簪

畏景衆芳歇仙葩此夷猶冰姿出新沐娟娟倚清
秋昨夢今見之風裏玉搔頭誰言閨房秀高情渺
林丘碧筵古銅壺一室香四周懷人成獨詠遠思
徒悠悠

野史亭雨夜感興

私錄關赴告求野或有取秋兔一寸毫盡力不易
舉衰遲私自惜憂畏當誰語展轉天未明幽牕響
疎雨

哭延孫

兒生去年冬閭里日相慶今年迫周晬疹痘俱已
竟爛斑綴錦衫未與玉雪稱宅相望此孫惜愛均
氣命一宵誰奪去遽有亡辜橫情鍾果難忘力挽
將安勝憶昔點妝初季女抱隣鏡灼灼芙蓉花澹
與清波映霜風入芳渚瘦綠餘荷柄嬌紅耿在眼
百喚不一應寂寞空鏡前老眼淚如迸

贈鷺

鄰墻擁高樹深樾陰衡宇山禽千百種晨夕所棲

處獨愛黃粟畱姪姹如稚女笑啼啼又笑宛轉工
媚嫵佞窺疑欲下轉盼忽驚舉花暗柳陰陰尚記
兒時語詩家此尤物名字喧樂府天真異絲竹容
服仍楚楚宮額畫眉闊黛黑抹金縷恨不掌上看
毛羽得細數山城無與樂好鳥亦求侶時持貫珠
來有唱當和汝

讀書山月夕二首

層崖多古木細路深莓苔柴門開曉日雲際青山
來靜中有真趣孤賞何悠哉

久旱雨亦好旣雨晴亦佳胡床對明月樹影含清
華墻東有洿池欹枕聽鳴蛙

繼愚軒和党承旨雪詩四首

南來何所如孤根轉風蓬以彼萬里途寄此一畝
宮明窗一繩床稍覺紛華空唯餘作詩癖尚與當
年同人言詩窮人無詩吾自窮此世等夢耳誰窮
復誰通茹噎當快吐聊此寬吾胸

今古幾詩人擾擾劇毛粟吾愛陶與韋冷然扣水
玉大雅久不作聞韶信忘肉求音扣寂寞一嘆動

隣屋水風清鶴夢月露洗蟬腹白頭兩遺編吟唱
心自足誰爲起九原寒泉薦芳菊

老麻臥雲壑澗松上崢嶸斯文要棟梁頽圯可力
撐匠石殊未來破屋燈青熒乾坤有二鳥一息當
一鳴區區用舍間而亦隨重輕百挽迹莫前一怒
怨已盈臨風三太息此意何時平

愚軒具詩眼論文貴天然頗怪今時人雕鐫窮歲
年君看陶集中飲酒與歸田此翁豈作詩真寫曾
中天天然對雕飾真贗殊相懸乃知時世妝粉綠

徒爭憐枯淡足自樂勿爲虛名牽

寄英禪師師時住龍門寶應寺

我本寶應僧一念墮儒冠多生經行地樹老并未
智一窮縛兩脚寸步百里難空餘中夜夢浩蕩青
林端故人今何如念子獨輕安孤雲望不及冥鴻
杳難攀前時得君詩失喜忘朝餼想君亦念我登
樓望青山山中多詩人杖屨時往還但苦詩作祟
况味同酸寒清涼詩最圓

相和尚
住清涼

往往似方干半

年臥床席瘡我疥亦頑

本草松枝條松脂
塗疥頑者三兩度

濟甫詩

最苦

僧源字濟甫宋州人

寸晷不識閒傾身營一飽船上八

節灘安行詩最工

慕容安行山陽人臨潼簿

六馬鳴和鸞鬱鬱

飢寒憂慘慘日在顏老秦詩最和

秦畧字簡夫陵川人

平易

出深艱脫身豺虎藜白髮罹惇鯨張侯詩最豪

前登

封令張效字景賢雲中人

驚風卷狂瀾竅繁天和洩外腴中已

乾城中崔夫子

崔遵字懷祖燕人

老筆鬱盤盤家無儋石

儲氣壓風騷壇我詩有凡骨欲換無金丹呻吟二

十年似欲見一班大笑揶揄生已復不相寬愛君

梅花篇入手如彈丸愛君山堂句深靜如幽蘭詩

僧第一代無媿百年閒思君復思君恨不生羽翰

何時溪上石清坐兩蒲團

夢歸

虛庭霜夜寒落葉風自掃况如南窗月坐失西山

道長安佳麗地游子自枯槁人生家居樂學稼苦

不早衡門眼中見歸意滿秋草夜長夢已盡愁絕

令人老

郎文炳心遠齋二首

茅齋迫官居塵土日蓬勃道人掩關坐挂眼無外

物明窗一蒲團濯足晨理髮一片萬古心清潭兩
明月

止性如止水惜身如惜玉婦姑得相安久矣脫羈
束兒童挾書至燈花催夜讀自是周太常生平耐
幽獨

蕭寺僧歸橫軸

山空秋草寒露暗光已夕悠悠松門月靜照禪客
入遙知夜堂深疎鍾動幽寂

祁陽劉器之以墨竹得名今年春薄游鹿泉

因爲予寫真重以小景見餉凡以求予詩
而已賦二十韻荅之

去國二十年跬步卽異境中間歷齊晉陡下如墮
井轍涸困波神祠廢臥土梗垂翅附危柯飢腹得
画餅阜櫪竝牛驥泥淖閔蛙黽紛紛疲應接碌碌
陪造請尚賴麴生賢真味畱雋永蹉跎鐘鼎意盡
付銅尾乘劉生工寫照遊戲出俄頃高懸大圓鏡
寓我形神影青衿昨日爾素髮忽垂領詩餘飯山
瘦智縮武庫瘦霄漢邈南宮寂寂媿鄧耿包虎錦

衾爛薛鶴霜毛整鼠目與麋頭何堪污毛穎厚貺
久未報重以大年景藜籜點棲禽樹石帶煙暝知
君深意在勸我事幽屏衡茅方卜築亦復謀二頃
封龍有佳招因之發深省

荅王輔之

我宅西山隅君居潁之濱昨朝與君語

或作語

憶我

山中春君家縣豪傑交結通周秦四海盧御史肯
來作師賓風流被諸郎文質猶彬彬乃知父兄意
潤屋亦潤身喪亂幾何時孤身走踈踈貂裘風霜

老獨有佳句新被褐懷珠玉知君未全貧我詩初
不工研磨出艱辛雖欲尸祝之芻狗難重陳顧方
媿盈川况敢同照隣汾流清復清堪君濯纓塵居
人與行客早晚期相親

寄題沁州韓君錫耕讀軒

東帶見督郵甘以辭華軒嘯傲南窗下且樂我所
然斜川今在亡問津有遺編行尋柴桑里遂得桃
花源桃源無漢魏况復義熙前讀書與躬耕兀兀
送殘年淵明不可作尚友乃爲賢田家豈不苦歲

功聊可觀讀書有何味有味不得言遙知一尊酒
琴在已亡絃





